

կիրառվում այդ վնասումների առաջն առնելու նպատակով և ֆօշը չէր ենթարկվում կանոնավորման և կազմակերպչական կարգավորման: Այսպես՝ Սրաշեն (Քիլիսաքենդ) և Շիկահող (Շիսավուղ) գյուղերի ծերունիները պատմում են¹⁹, որ Զանգեյանի և Մինչևանի թուրքերն ամառը բարձրանում էին խուստուփի արոտավայրերը: Փօշվօրենքից ամեն մի խումբ սովորություն ուներ իջևանելու ճամփին մի որոշ տեղ, որը այս դաշտում, որը այն աղբյուրի մոտ: Սովորաբար թուրքերն ունենում էին գյուղում ֆիշվանջ (բարեկամներ): Անցնելու միջոցին նրանց այգիների պտուղներից և տան հավերից թուրքը օգտվում էր և փոխարենը սարից ուղարկում էր նրանց պանիր, յուղ և այլ կաթնամթերք, օգրեքեն և ոշխարի մորթի և բուրդ: Այսպիսով մի հայտնի հավասարակշռության մեջ էր գրվում երկու կողմերի հարաբերությունը և գյուղը պաշտպանվում էր ֆօշվօրենքի անսանձ թալանից և կողոպուտից: Սակայն պատահում էր և այնպես, որ թուրքերն երկար էին մնում գյուղի հողերում և սար բարձրանալն ուշանում էր, մինչև որ գյուղի սահմաններում կերը վերջանում էր և գյուղի տավարի համար բան չէր մնում: Աշնանը՝ սարից իջնելիս՝ ֆօշվօրենքը չէին շտապում իջնել ցածրադիր արոտավայրերը, երկար կանգ էին առնում գյուղի մոտ և իրենց օբանքը ձգելով հնձած արտերում՝ այստեղ անասունը արածացնում: Մի տարի, դա 90-ական թվականների վերջերքն էր, ձմեռը շուտ էր հասել, ձյունը սարերում շուտ էր եկել և ֆօշվօրենքը հարկադրված էին սովորական ժամկետից ավելի վաղ իջնելու, երբ հայկական գյուղերում արտերի հունձը դեռ ավարտված չէր: Հայերից շատերը արագացրին իրենց հունձը, իսկ Շիկահողի բնակիչները որոշեցին զինված կանգնել ճամփաների երկու կողմերում և թույլ չտալ ֆօշվօրենքին գյուղի մերձակայքում կանգ առնելու: Այդպես էլ լինում է. խումբ-խումբ հետզհետե հեռանում էին: Բայց գյուղից բավականին հեռանալուց հետո նրանք մտածում են, որ ապագայումն էլ հայերն արգելք կլինեն իրենց հողերի վրա ֆօշվօրենքի հոտերի կանգ առնելուն, հավաքվում են և միացած ուժերով հարձակվում շիկահողեցոց վրա: Տեղի է ունենում զինված ընդհարում: Թուրքերը ետ են մղվում, բայց արտերի մի մասը վնասված է լինում: Հայերը դիմում են դատարանին և վնասը՝ մոտ 1500 ո. պահանջում: Մեջ են ընկնում միջնորդները, տուգանքը չեն վերցնում, որ թրշնամությունը ապագայում չշարունակվի, բայց պայման է դրվում, որ թուրքերը սար բարձրանան ոչ թե գյուղի կամ արտերի միջով, այլ կողմնակի ճանապարհներով և հսկողություն կազմակերպվի ֆօշի բարձրանալու և իջնելու միջոցին:

Այսպիսով, գյուղը ինքն էր հնար որոնում տարբեր ձևի տնտեսություններ վարող երկու ազգությունների փոխհարաբերությունները կարգավորելու համար: Ցարական կառավարությունը կտրուկ միջոցներ ձեռք չէր առնում նրանց խաղաղ համակեցությանը խանգարող պատճառները վերացնելու: Ընդհակառակը՝ ցարական կառավարությունն իր դեմ ուղղած հեղափոխական տրամադրությունների զարգացումը կանգնեցնելու և անդրկովկասյան ժողովուրդների մեջ ինքնավարական ձգտումներն արգելակելու նպատակով՝ ամեն կերպ խորացնում և սրում էր այդ տնտեսական բնույթ կրող պատճառները: Ցարական կառավարությունն օգտագործում էր դրա համար և կրոնական հակադրությունները և այն, որ Զանգեզուրում էլ ծագող կապիտալիստական կարգերը մեծացնում և ամրացնում էին գավառական կյանքի մեջ հայերի գրաված դիր-

¹⁹ Մեսրոպ արքեպ. Տեր Մովսիսյանի վկայությամբ: